



Inatsisartuni ilaasortaq, Michael Rosing, Attaviitsoq

## **Sikuki Nuuk Harbour eqqaani nunaminertanik attartortitsineq pillugu apeqquteqaat**

05-12-2017  
Sags nr.: 2017 - 24710  
Dok. nr. 25486052

25. oktober 2017-imi apeqqarissaarnermi umiarsualiveqarfik pillugu apeqquteqaatinnut qujanaq.

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
www.naalakkersuisut.gl

### **Apeqqut: Sikuki Nuuk Harbour-ip eqqaani nunaminertanik attartortitsineq nunaminertanik atugassiisarnermi maleruagassanik unioqqutitsinerua? Tassalu naatsumik oqaatigalugu – Sikuki-p taamaaliornera inatsisinik malinniffiua?**

Akissut: Nuummi umiarsualiveqarfimmi sanaartornissaq, piginnittuunissaq, ingerlatsinissaq ineriartortitsinissarlu, aammalu taakkununnga assingusunik suliaqarnissaq Sikuki Nuuk Harbour A/S-imi (Sikuki) siunertaavoq.

Sikuki-p niuernermit piumasaqaataani, Naalakkersuisunit akuerineqartuni kapitali 8-mi allassimavoq, Sikuki nunaminertanik attartortitsinnaasoq. Kommuninut, Nunaqarfinnut, Isorliunerusunut, Attaveqatigiinnermut Ineqarnermullu Naalakkersuisoqarfiup akuersissut pissutsinik arlalinnik tunngaveqartippaa.

Umiarsualiveqarnermut inatsimmi § 7-imi aalajangersarneqarpoq, umiarsualivimmik ingerlatsisoq umiarsualivimmi attaveqaatinik, inissiiffissanik pigisanillu aalaakkaasunik attartortitsisarnermik ingerlatsinnaasoq.

Umiarsualivinnut inatsimmi § 12 naapertorlugu umiarsualiviutileqatigiiffiup inuussutissarsiortut assigiimmik killilersorneqaratillu umiarsualivimmik atuisinnaanissaannut aalajangersakkanik aalajangersaanissaanut Naalakkersuisut akuersissuteqarsinnaapput. Naalakkersuisut umiarsualivinnik piginninnissamut ingerlatsinissamullu Sikuki-mut akuersissutaanni, atortunut pioreersunut tunngatillugu imatut allassimasoqarpoq: *"Umiarsualiviup atortuinik neqerooruteqartitsinermi, tamatuma soqutigisaqartut attuumassuteqartut akornanni pituttorsimanngitsumik naligiimmillu unammilleqatigiiffiusumik pinissaa qulakkeerneqassaaq. Naalakkersuisut umiarsualivinni atortut atorineqanngitsut attartortinneqarnissaannut allagarsiisarnermut maleruagassanik aalajangersaasinnaapput"*. Maleruagassanik taamaattunik aalajangersaasoqarsimanngilaq.

Nunaminertanik atugassiisarnermut inatsit malillugu nunaminertap nalinga annikinngippat, nunaminertamik atugassiisinnaasup nammineerluni nunaminertaq – tamakkiisumik ilaannaasumilluunniit – tunniussinnaavaa. Tamatumani illut pineqartariaqanngillat, kisiannili aamma sanaartorfissagissaanerit, asfaltherinerit,

assersuutigalugu ilitsivissanik narlorissaanissaq siunertaralugu qaarterinerit,  
ungaluliinerit il.il. pineqarsinnaallutik.

Sikuki-p pilersinneqarneranut atatillugu umiarsualivik pioreersoq ingerlatseqatigiiffimmut  
aallarniutitut akiliutigineqarpoq. Naliliinermi nalunaarusiami umiarsualiveqarfiit  
attartortinneqarnissaat siunnerfigineqarpoq.

Inussiarnersumik inuulluaqqusillunga

Erik Jensen 